

**Uunga siunnersuut: Kalaallit Nunaanni annaassiniarnissamut upalungaarsimaneq
amma ikuallattoornissamik qaartoornissamillu pitsaliuinermi iliuusissat pillugit
Inatsisartut inatsisaat**

(Ineqarnermut, Attaveqarnermut Angallannermullu Naalakkersuisoq)

pillugu

Attaveqarnermut Ineqarnermullu Ataatsimiititaliap

ISUMALIUTISSISSIONTAA

Inatsisissatut siunnersuutip aappassaaneerneqarnerani saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Justus Hansen, Demokraatit, siulittaasooq

Inatsisartunut ilaasortaq Olga P. Berthelsen, Inuit Ataqatigiit, siulittaasup tullia

Inatsisartunut ilaasortaq Debora Kleist, Inuit Ataqatigiit

Inatsisartunut ilaasortaq Kim Kielsen, Siumut

Inatsisartunut ilaasortaq Akitsinnguaq Olsen, Siumut

Siullermeinerup kingorna ataatsimiititaliap siunnersuut erseqqinnerusumik naliliiffigaa imalu oqaaseqaateqassalluni:

Siunnersuutip tunngavigisaa imarisaluu

Inatsisissatut siunnersuutip kingunerisaanik ikuallattoornissamut inatsit maanna atuuttoq Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaliuinermi iliuusissat pillugit inatsimmik nutaamik taarserneqassaaq.

Upalungaarsimanermut tunngasuni maleruaqqusanik ullutsinnut naleqqunnerusunik pisariaqartitsinerup aaqqiivigineqarnissaa, tassami inuiqatigiinni ineriartornerup kingunerisaanik upalungaarsimanissamut piumasaqaatit annertusiartuinnarmata, ilaatigullu suliassat upalungaarsimanermik suliaqartut tigujartuaagaat inatsimmi atuuttumi ersersinneqanngitsut ilangunneqarnissaat siunnersuummi ilaatigut pingaarnertut anguniarneqarpoq.

Tusarniaaneq

Tusarniaanermiit akissutit tiguneqartut attuumassuteqartut siunnersummut nassuaatini ilanngunneqarsimasut ataatsimiititaliamit maluginiarneqarpoq.

Isumasioqatigiilluni ataatsimiinneq

Ataatsimiititaliap siunnersummik suliaqaqqinnissaanut atatillugu pissutsit arlallit qulaajarneqarnissaat siullermeerinermi kissaatigineqarpoq. Taamaattumik suliassaqarfimmi Naalakkersuisunut ilaasortaq ataatsimiititaliap isumasioqatigalugu ataatsimeeqatigaa.

Siunnersuutip tusarniaassutigineqarneranut, siunnersuutip aningaasaqarnikkut kingunerisaanut, qatserisartut annaassiniartartullu nuna tamakkerlugu upalungaarsimanermut ataatsimiititaliarsuarmi ilaasortaataqnerat pillugu Naalakkersuisut isumaannut, qatserisartutut ilinniartitaanerup annaassiniartartutut ilinniartitaanermik tapertalerneqarnissaanut kiisalu siunnersuutip aappassaaneerneqarnissaata ukiakkut ataatsimiinnermut kinguartinneqarnissaanut periarfissamut pingaartut attuumassutilinnik Ataatsimiititaliaq Naalakkersuisunut ilaasortamut arlalinnik apeqquteqarpoq. Ataatsimiititaliap apeqqutai Naalakkersuisullu akissutaat isumaliutissiisummut matumunnga ilanngunneqarput.

Siunnersuutip sularineqarnera

Siunnersuut siullermeerneqarmat siunnersuut ataatsimut isigalugu pitsasutut isigineqartoq ataatsimiititaliap maluginiarpaa. Taamaattumik isumasioqatigiilluni ataatsimeeqateqarnermi Naalakkersuisunut apeqqutigisamini ataatsimiititaliap apeqqutit siuliani taaneqartut kisiisa aalluppai. Naalakkersuisut akissutaat ataatsimiititaliap tusaatissatut tiguai, tamatumali peqatigisaanik apeqquteqarnissaminut periarfissinneqarluni.

Tamanna pillugu apeqqummut atatillugu suliassaqarfimmi Naalakkersuisunut ilaasortaq akisuteqarpoq ikuallattoornissamut upalungaarsimanissamullu atortut pillugit minnerpaaffigitassanik Naalakkersuisut kommuninut piumasaqaateqanngitsut. Tamanna kommunit kisimik akisussaaffigigaat aammalu suliassaqarfimmi tamatumani Naalakkersuisut kommuninut nakkutilliisunngitsut aamma erseqqissaatigineqarpoq. Najukkani pissutsit annertuumik assiginnngissuseqarnerat pissutigalugu atortunut atatillugu minnerpaaffigitassanik piumasaqaateqarnissaq naapertuutinngitsoq Naalakkersuisut isumaqarput. Ataatsimiititaliarli paarlattuanik isumaqarpoq, taakkorpiaat pineqartut tunngavigalugit upalungaarsimanissamut minnerpaaffigitassanik piumasaqaateqarnissaq pisariaqartoq.

Sakkunik assartuutinillu inuinnarnit pigineqartunik annaassiniarnissamut upalungaarsimasut atugassinneqarnissamik siunnersummi § 15-imni aalajangersagaq malillugu piumasaqaateqarsinnaanerisa saniatigut illutanik atugassinneqarsinnaanerup ilanngunneqarnissaa pillugu

kissaateqarnermut atatillugu inatsisip oqaasertaasa taamatut ilaneqarnissaat pisariaqanngitsoq Naalakkersuisunut ilaasortaq isumaqarpoq.

Aningaasaqarnikkut tunngavissanik tamakkiisumik qulaajarneqanngitsunik siunnersuut una imaqartoq, taamaattumillu siunnersuut 2010-mi ukiakkut ataatsimiinnermi aappassaaneerneqartariaqartoq ataatsimiititaliami ikinnerussutilit aalajangiusimavaat. Akerlianik aningaasaqarnikkut tunngavissat tamakkiisumik qulaajarneqarsimannginnerarlugit oqarnermut Naalakkersuisunut ilaasortap isumaqataannginninni aalajangiusimavaa.

Siuliani apeqquteqaqqinnermi sammineqartut nalinginnaasumik tapersorsorneqarput, tamaniali siunnersuutip matumani pineqartup akuersissutigineqarnissaata kinguartinneqarnissaanik kinguneqarani. Sammineqartulli taakku inatsisip allanngortinnejarnissaanik siunnersuutikkut ukiakkut ataatsimiinnermi saqqummiunnejarsinnaanerat ataatsimiititaliamit kaammattuutigartinneqarlunilu tapersorsornartinneqarpoq. Tassani pineqarput atortut il.il. pillugit minnepaaffigitassanik piumasaqaateqartoqarnissaanik kissaat, suliassaqarfimmi Namminersorlutik Oqartussat kommuninik nakkutilliinissaasa pisariaqarnera kiisalu illutat § 15-imi aalajangersakkamut ilanngunniarneqarnerat.

Tamanna tunngavigalugu siunnersuut Inatsisartunit akuersissutigineqassasoq Ataatsimii-titaliap isumaqatigiittup inassutigaa.

Taama oqaaseqarluni Attaveqaqatigiinnermut Ineqarnermullu Ataatsimiititaliap siunnersuut Inatsisartunut aappassaaniigassanngortippaa.

Justus Hansen,
Siulittaasoq
Demokraatit

Olga P. Berthelsen,
Siulittaasup tullia
Inuit Ataqatigiit

Debora Kleist
Inuit Ataqatigiit

Kim Kielsen,
Siumut

Akitsinnguaq Olsen,
Siumut